

四庫全書

史部

欽定四庫全書

平定兩金川方略卷四十二

十一月己亥溫福豐昇額奏言

臣

等自十月二十

四日至二十八日派撥官兵進攻兜烏山梁及附

近賊寨哈國興額森特巴雅爾阿爾蘇納等帶兵

攻上喀木色爾寨北山梁取穆拉斯郭大寨佔據

兜烏山頂與馬彪兵合悉奪兜烏附近碉卡喬蘇

爾帶兵從鄂克什舊寨之北鼎達實諾爾山奪取

碩卡海蘭察帶兵從色木僧格山前進至格寔迪連奪碩卡進取木城現在據守要隘取路進攻明郭宗以期迅速集事奏入

上諭內閣曰此次在事奮勉之頭等侍衛阿爾蘇納著賞給副都統職銜三等侍衛巴雅爾著授為二等侍衛

同日溫福豐昇額奏言現在大營移至喀木色爾之前則鄂克什舊寨木蘭壩一帶皆為後路應將

阿克木雅所駐官兵今總兵張大經移至木蘭壩
鄂克什舊寨一帶駐扎至收發軍火等事有總兵
富紳員在資哩寨管理後路應令富紳移至阿克
木雅駐扎福昌仍留資哩又北山色布色爾係旁
通達木巴宗資理等處要路仍令章京佛進泰福
音保副將成德遊擊賈魁武等帶兵自色布色爾
至美美卡日喀爾橋上至兜烏分駐防守再查大
兵已過喀木色爾無庸由策卜丹一路進兵其駐

扎貢噶之提督李煦應令其酌量帶兵移至瑪爾
迪克總路口駐扎其餘官兵均調赴海蘭察處以
資攻勦奏入

上嘉之

同日

上諭軍機大臣曰溫福等奏瓦寺土舍索諾木雍中請
將伊所賞名號花翎移給伊叔土司索諾木旺丹等
語索諾木旺丹感戴朕恩因年邁不能從軍令索諾

木雍中帶領所屬人等隨營効力殊屬可嘉著加恩
於現在職銜上加陞一級並賞戴花翎給與名號以
示優獎其索諾木雍中現在軍營出力所有原給名
號花翎毋庸移給

同日

上諭內閣曰溫福等奏都司黃壯畧守備王廷玉均係
應降二級調用之員總兵馬彪現係革職留任該員
等以一年未領兵打仗奮勉出力可否分別加恩等

語馬彪准其開復黃壯畧王廷玉均著改為降二級
留任

庚子

上諭內閣曰戶部議奏續調赴川之昭通兵三千名所
需禦寒衣帽在滇已每名折給銀兩令其自製及到
川後復經文綬辦給事屬重複令議將川省製就衣
帽准其按名給與其價銀在於各兵坐餉內分扣歸
款自應如此辦理但念該兵丁等現在隨營効力其

應得坐餉為養贍家口所必需且近據阿桂奏昭通
兵連日打仗尤為勇銳爭先著加恩將此項衣帽價
銀俟凱旋後再行坐扣並著阿桂曉諭在營滇兵知
之

壬寅舒常奏言噶爾木魯宗巴朗索三處原係賞
給綽斯甲布地方理應斷還但從噶免亦現在出
兵助勦遽奪其地恐致失望因諭令兩土司各自
出力俟事竣後秉公剖斷並諭綽斯甲布如果實

心報効將來事竣之日定邀優賞該首聞言色喜
奏入

上諭軍機大臣曰舒常奏傳諭綽斯甲布土司之語與
朕旨適相符合著將此摺抄寄阿桂閱看

甲辰阿桂奏言查官兵自佔奪格魯克古以來已
據金川賊來正路所有運送口糧之賊連日鎗礮
共斃十六七名久不敢于日間行走但賊番所據
四峯碉卡俱極陡險若僅恃直前攻撲不無多傷

兵力自應繞截來路始為要策臣令土兵等密探
四峯之東可從山坳一帶繞近前敵惟是賊番鬼
蜮伎倆其行走不必盡由徑路凡屬崖箐中間畧
可措足之地即能潛行出入若于此繞道圍攻必
將賊番可以衝突抄截之處節節分兵駐守而正
對賊番高峯碉卡之各營盤亦必嚴加防範今明
亮等趕造大砲一俟鑄就一面轟擊對面賊碉一
面于緊要處所添修石卡即可撤出官兵以為進

攻之用至達烏前敵

臣

擬黑夜渡河襲擊西山陡

壁上賊礮原屬冒險奇之計但賊番未必不恃其

山勢陡削直插河流揣度官兵無由前往因而防

守稍疎

臣

總于數日內督兵進取以期與山梁上

官兵兩相接應速破險隘

同日阿桂奏言此次參將汪騰龍鄭國卿等先攻

甲魯原因其地險要既得甲魯或直特正地或取

甲爾壘壩皆可進兵第該參將等所帶漢土內如

德爾格忒等馬上番民皆不長于步行登山現在
兵力難分兩路應俟該參將等攻得正地山口礮
柵進奪甲爾壘壩之後或應從正地進兵或撤兵
前赴綽斯甲布併力進勦相機酌辦均奏入報

聞

同日

上諭內閣曰阿桂奏前鋒校喜當阿登色保于攻奪甲
爾木山梁時奮勇殺賊著照所請均賞戴花翎俟有

委署前鋒參領缺出即著喜當阿補授委署前鋒侍衛缺出即著登色保補授

上又諭內閣曰阿桂奏雲南曲尋協守備國士豪身先士卒殺賊奪碉東川營千總楊大山校砲擊賊踰險乘高雖各得傷不肯在營調理實為奮勇出衆國士豪著賞戴花翎楊大山著賞戴藍翎

丙午溫福豐昇額奏言

臣

等率領海蘭察等由色

木僧格前之格寶迪地方進兵奪取大碉石卡查

勘南北兩山情形北山山梁攻取較為稍易因於
十一月初四日夜發兵至天明時額森特由穆拉
斯郭山繞至博爾根山頂佔據大寨哈國興由以
本色爾北山旁進奪額爾奔木柵海蘭察自山後
進奪賊卡復奪取瑪覺烏大寨_臣等以此處甚關
緊要當經往添兵駐守

同日溫福豐昇額又奏言前派二等待衛巴圖魯
烏什哈達於偏近路頂宗處所築卡攻賊烏什哈

連晝夜與賊打仗趨築木城卡座進逼賊寨用砲轟擊碉卡摧毀甚多及攻克路頂宗時雖因染患寒疾未經在事而路頂宗之得以克取均奏入

上諭軍機大臣曰溫福等此次進兵分隊佔據博爾根山梁並攻克瑪覺烏寨落取路前進甚合機宜但細閱地圖簇拉角克那拉覺等處賊碉林立與我兵後路相通者甚多溫福等宜善為防範其進兵則仍應照攻取路頂宗等處籌辦分路方為有益

上又諭軍機大臣曰溫福等奏攻取路頂宗喀本色爾
時烏什哈達及富爾寨等八人均各奮勉烏什哈達
著陞授頭等侍衛其革職留任之案並著開復富爾
賽巴達瑪庫勒德岱森保那薩拉碩多爾海楚巴什
博和爾岱均著授為藍翎侍衛以上各員及其餘奮
勇出衆官兵有應實巴圖魯名號者無論滿洲綠營
土練查明挑選二三人奏請賞給

丁未舒常奏言金川逆酋將被留兵丁楊會先放

回投遞書稟據供在西路南山水卡進攻被掠及
回營時金川頭目告稱官兵攻我未識

大皇帝知與不知如必欲攻我我不得不防備又聞賊

番各寨中共有內地兵丁八九十名至所見守達

爾圖山梁之頭目通事即在西路被掠時所見之

二人等語軍營無認識番字之人已將逆酋原稟

馳交阿桂處譯奏並將楊會先送赴遠烏備訊奏

入

上諭軍機大臣曰舒常奏到楊會先供詞係在西路南
山水卡進攻其因為賊所掠何以未據溫福等奏
及至所稱賊匪各寨拘留八九十人此等兵丁何由
為賊所得且營兵有數可稽如係帶兵將領未經呈
報即著查明參劾或各營稟報而溫福等以為無關
緊要不即奏聞亦著據實覆奏又據供所見守達爾
圖山梁之頭目通事即在西路被掠時所克之二人
等語此必賊匪因我兵由綽斯甲布一路進攻遂將

助逆頭目撤回防守是西路各寨金川賊衆漸少溫福等益當乘隙直入自更易於得手至西路助逆頭目既經撤回南路一帶亦必潛行抽撤况溫福等現在進攻明郭宗距美諾甚近則南路官兵尤當乘機奮擊使賊番不能兼顧自可尅期擒穴擒渠再金川逆首稟詞譯出情節與楊會先供詞是否相符並此外有無契緊關鍵阿桂即應知會舒常一面奏聞

同日舒常又奏言現在定期進兵山險碉堅必須

用砲轟擊屢經扎催銅觔砲匠尚無音信奏入
上諭軍機大臣曰舒常一路所需銅觔砲匠著傳諭文
綬迅速趕辦選派委員尅期解往一面奏聞此等事
乃文綬專責何竟任催不應如再有遲延致悞進剿
恐文綬不能當其罪也

戊申阿桂奏言臣前此紮造皮船擬於黑夜渡河
襲取西山陡壁上賊番碉卡以期壓破前敵但察
看情形西面山產直挿河流其上本無路徑惟踰

看山岩凹凸之間有三處畧可爬越而登其上均有賊番碉卡向日斷難借手臣連日體察賊勢於十一月初三日分撥漢土兵丁於黃昏後先將預備皮船橋科潛運渡口即於是夜分撥官兵搭橋陸續渡河至初四日卯刻千總劉世勲帶領第一隊屯兵繞至西山最高石卡上首撲進奮擊將西山頂佔據把總王興邦帶第二隊巴旺布拉克底土兵將山半各碉卡攻得第三隊明正噶密土兵

復將沿河山根各卡奪據其時東面山下總兵王
萬邦章京圖欽保等各領黔陝官兵拔開木柵並
將木城石卡攻破赴東面之翁古爾壘西面之布
喇克尼德古及紐寒各地方均於已刻以前攻克
守備催文傑督催土兵及遊擊劉輝祖等帶昭通
等兵於攻得西山碉卡後越過山溝攻得石卡兵
下尚有雍德里官寨一所臣於是時派侍衛將領
等帶領楚兵於西面一帶山梁分布據守即督勵

官兵將雍德里三面圍攻至次日早攻破又得永
梅尼爾瑪等碉座此次共奪得大木城一座碉寨
一百餘間石卡五十餘座臣查東西兩山懸崖壁
立下逼奔湍各弁員等於碉卡林立中蟻附奮攻
其前敵木城又極堅固賊於城外挖掘深溝松籤
密布溝外將土例鬆使攻撲者易於踣陷木城內
復築石牆牆內有石碉四座互相援助官兵等俱
能鼓勇先登迅時攻破實為勇銳臣現將攻開前

敵緣由飛行明亮令其迅速夾攻以期及早會合

臣即移營翁古爾壘密籌進取至千總郭士才因

首先奮勇拔開木柵騰身躍入以致陣亡奏入

上諭內閣曰此次阿桂實心籌畫調度有方並在事出力之將弁兵練均著交部議叙至貴州千總郭士才首先拔柵以致陣亡實堪憫惜著加恩贈都司銜交部議卹仍賞銀一百兩給付其家並著恩查明郭士才有無子嗣如年已多歲即送部帶領引見

上又諭軍機大臣曰阿桂之子拜唐阿阿爾達著加恩授為藍翎侍衛

上又諭軍機大臣曰前以阿桂攻克甲爾木山梁賞給內大臣銜隨據具奏懇辭因諭令俟攻得僧格宗即傳旨謝恩今阿桂如此勇往即著在軍營傳旨奏謝如能徑取僧格宗掃穴擒渠自當再頒酬庸渥典至官兵已得翁古爾壘隘口正賊番破膽之時且據所獲達爾結供稱距僧格宗不遠有噶察地方聞僧格

桑尚欲調兵拒守等語阿桂若及其守拒未定迅速
勦擊自易為力惟僧格桑勢已窮蹙亟宜留心訪察
斷其潛通金川之路倘逆酋逃往金川即應督兵與
索諾木一併勦擒不得僅向索取現今另降諭旨詳
晰傳示兩路遵照妥辦再我兵攻得翁古爾壘東西
兩面山梁此等要隘得之頗屬不易其間路徑叢雜
並當設法堵禦毋為賊所竊佔而我兵所過後路更
須加意防範俾糧運接續通行賊番不能在後抄截

庶為萬全

臣等謹案大軍分路進攻勢如破竹僧格桑自知罪重難宥亟圖竄逸

皇上屢頒明旨令西南兩路大臣留心訪察斷其通金川之路實為此時要著未幾僧格桑見大兵電掃颶馳美諾危巢斷難支禦退而思守布朗宗旋以力弱勢窮遂由美卧溝竄往金川仰見

乙夜運籌數千里外

洞鑒無遺後因我兵乘勝深入

諭以山徑叢雜竊佔既當堵禦抄截更藉嚴防

天語重申丁寧周至當捷書連奏之時

聖心益持兢業洵非臣下所能窺測萬一者也

上又諭軍機大臣曰阿桂此次所獲活口據供有金川

頭目六人帶兵千餘在南路守禦即從前溫福等所

獲活口供稱西路亦係金川賊目助守而董天弼所

奏木了山梁一帶亦然索諾木抗顏助逆尚欲托為

恭順自謂並無干犯昨據舒常奏金川頭目有官兵
攻我未識大皇帝知與不知如必欲攻我不得不防
備之語實為狂悖可惡溫福等於進勦金川竟當明
白宣諭爾索諾木本一土司輒敢黨助僧格桑抗拒
王師罪已不赦况爾父郎卡蒙恩曲宥爾復肆行悖
逆即屬再犯其罪更在僧格桑之上且爾自言派往
小金川之賊係爾姊賠嫁之人今小金川各處經官
兵投復者金川賊衆居多豈皆隨爾姊賠嫁者乎在

爾祇因僧格桑以地許給遂利其所有希冀吞佔名
為相助實欲自取此又必當亟加天討者本將軍等
奉大皇帝之命領兵征勦一切皆稟受機宜期於殄
平兇逆淨掃蠻氛爾既為內地土司當知中國法度
豈有不奉諭旨而調兵征討之理何得託辭故問大
皇帝知與不知乎爾自以地險可守私幸無虞如小
金川碉卡未嘗不險拒守未嘗不堅天兵所臨勢如
破竹爾金川即竭力支持不過苟延歲月安得如許

力量久與天朝抗乎至僧格桑竄入金川此時即將
逆首執縛爾索語木一同親赴軍門叩首請罪尚可
諒爾誠悃代為奏聞或冀邀恩貸汝一死若復藉詭
詞取巧至危急時將僧格桑獻出求免斷斷不能至
爾金川百姓因賊首派助他人死傷甚衆爾等何苦
捨死更為賊首抗守若早知改悔實意歸誠即將索
諾木兄弟縛獻請命不但重加賞賚必且仍舊安置
土地長享太平倘迷而不悟直至金川攻破勒洗無

餘悔無及矣我軍進攻金川時照此檄諭沿路傳云
自可破賊膽而渙其勢將此傳諭溫福阿桂等知之
上又諭內閣曰據阿桂將奮勉出力之侍衛官兵查奏
請旨副參領圖釵保著授為額外參領俟本營前鋒
參領缺出坐補遊擊谷生琰賞給巧親巴圖魯名號
並賞戴孔雀翎護軍額魯特栢凌著授為藍翎侍衛
賞給銜前巴圖魯名號三等侍衛委署營總哈清阿
著授為二等待衛

上又諭內閣曰昨原任川東道託隆回京詢以阿爾泰在任行事已將其贓蹟各款遂一開出因令軍機大臣詢問阿爾泰之子明德布據供實有派令屬員代買物件少發價值之事又前任龍安府知府馬權保荐卓異曾有送給松石朝珠及皮張各件等語是阿爾泰婪索情節已屬確鑿無疑不可不徹底根究著文綬併案嚴審李本身仕藩司乃於阿爾泰恣意貪婪不早據實陳奏實屬徇情容隱李本著革職交與

文綬一併審擬具奏四川布政使員缺著錢瑩補授

平定兩金川方略卷四十二

欽定四庫全書

平定兩金川方略卷四十三

十一月壬子溫福豐昇額奏言

臣

等于十一月初

六日黎明時督令哈國興帶兵攻達克蘓山巔大
礮其時普爾普等領兵奪據山巔向下賊礮以斷
賊人來路海蘭花等領兵上攻達克蘓山復令章
京觀音保帶兵由山下小路進奪賊礮與海蘭察
兵上下合擊並將此山礮卡以次奪據其巔大礮

雖未免攻

臣

等議令哈國興等留兵扎營以牽綴

賊勢一面統領大軍由達克蘇山脚進攻明郭宗

庶為有濟奏入

上諭軍機大臣曰溫福等奏攻取達克蘇山賊寨碉卡
所辦自合機宜但高峯碉內賊人尚有牽綴之兵南
山三道大溝仍有通我兵背後之路益當留心防求
再據擒獲賊番所稱番衆心變亦勢所必然如果將
僧格桑擒獻即應亟予獎勵加恩撫其餘衆則辦理

小金川之局便可完結并可令金川賊番聞之心動
更有裨益至海蘭察哈國興及侍衛章京等節次進
攻均屬奮勉俟攻克明郭宗之日一併議敘

上又諭內閣曰福昌前因山神溝帶兵進剿一事降旨
革職令其自備資斧効力贖罪今該員在資哩一帶
防守後路兼管收發軍火諸務並無貽誤且在營効
力已及一年著加恩以參將委用

上又諭軍機大臣曰董天弼統兵攻底木達原以擒獲

澤旺為要著現在阻隔山梁未能深入今據溫福等
奏所獲賊番嘉噶爾供稱從前澤旺向僧格桑云我
曾在將軍前乞恩不允如今再言亦不相信汝須速
即出去叩頭求免方是等語是澤旺之心尚存畏懼
自應乘機誘其來降設法擒獲則布朗郭宗底木達
一帶並可藉澤旺之名招至自當不攻而潰所謂兵
不厭詐也特命軍機大臣代擬檄稿並令解到通事
繙出發去若此則董天弼尚未攻克底木達即將此

檄傳示仍於發檄後督兵奮攻並將澤旺奉檄情形
奏聞

癸丑阿桂奏言本月初六日據守備崔文傑報稱
官兵進至得里又進至日寨又進至札覺木將各
碉寨攻克又據守備馬廷亮范玉先報稱順河進
攻佔據山頂碉寨復于是夜攻得石卡又於是夜
日據總兵伊常阿報稱督兵潛上岳魯山梁將各
卡柵奪取其甲爾木一帶據明亮報稱於初七日

子刻令綏庫喜當阿劉倖等潛攻真登梅列高峯
大碉各隊官兵同時撲上賊番彼此不能相顧棄
碉潰竄退守金川之當噶爾拉遂將各碉卡及石
房佔據又侍衛德赫布守備李植善於初七日黎
明將格魯克古後山頂大小卡座亦皆奪取現在
整頓兵力進攻扎爾瑪等處碉卡一面勦洗翁古
爾壑前面東山賊卡即可從納圍納扎木等處直
壓至僧格宗阿桂又奏言據音吉圖稟稱明正及

革布什咱番民頗肯向前打仗其餘土兵雖嚴令督催亦不向前等語經臣諭以驅使番民當有駕馭之術若專務督催轉失其心汪騰龍雖染綠營習氣但南路軍營求一畧識番情者絕不可得是以暫令汪騰龍統兵臣仍隨時指示策勵以期無悞阿桂又奏言據音吉圖汪騰龍稟稱革布什咱頭人磋結告稱正地為金川產糧之所現在甲爾壩壩與正地山口碉寨賊番口糧皆取結於此甲

魯之西約十里許地名格津可以越山繞道至正
地之嘉資山此係金川往正地山口及甲魯甲爾
壘壩之要路若於此處派兵安設木柵截其糧道
不過半月賊人糧絕則山口礮柵可以不攻而得
但自格津至嘉資約有百里中隔雪山兩重此時
是否可行現遣弁兵及土弁等前往蹣探臣仍飭
其上緊料理以期迅速攻克均奏入

上諭軍機大臣曰現在翁古爾壘等處隘口節次攻破

賊已失其險要且據阿桂奏從前進取可以直壓僧
格宗等語官兵屢經奏捷阿桂等當乘其銳氣徑擣
美諾擒縛逆豎以待酬庸渥典更有另摺奏現擬派
兵於正地嘉資山截斷賊人糧道所籌甚是至所稱
土兵除明正及革布什咱番民外均不向前等語土
兵隨營征勦惟在善為駕馭恐音吉圖未能隨時妥
辦汪騰龍到川不久亦未必深悉番情阿桂當檄令
伊等曉諭土民故能攻奪緊要碉卡必當報明叅贊

優叙如實係向前出力雖未得有功績亦必據寔呈報量為獎賞如此則有用土兵益加感奮即退後者亦當觀感知改

上諭內閣曰阿桂此次分兵越險董率有方明亮伊常阿德赫布倍覺奮勉其在事之將弁兵練亦均為出力並著交部議敘明亮德赫布已有旨各賞副都統銜伊常阿有降級留任之案著加恩開復守備崔文傑已照阿桂所請准其陞補都司馬廷亮范玉先均

著量加一等陞用再西山梁甲爾木及正地山口打仗官兵間有傷亡者並著阿桂核實咨部議卹

上又諭內閣曰德赫布明亮領兵進勦連克碉卡奮勇可嘉德赫布著賞給副都統銜明亮著授為頭等待衛仍賞給副都統銜綏庫帶兵亦屬奮勉著授為二等侍衛

甲寅

上諭內閣曰三等待衛明仁尚屬奮勉著加恩授為二

等侍衛

乙卯

上諭內閣曰昨由京派往西南兩路之滿洲額魯特兵
丁均經賞給頂翎前次溫福有滇赴川帶有滿洲兵
二百名在營効力較多一年尤宜酌加恩賞著交溫
福阿桂等查明此項兵丁未經給有頂翎者一體賞
給戴用遇有京城各營員缺陸續補授

丙辰

上諭軍機大臣曰西路軍營自攻破路頂宗兜烏進攻
明郭宗可以徑抵美諾南路則有翁古爾壘及甲爾
木等處直壓僧格宗而各路分勦之兵亦皆奮勇克
捷平定小金川之事計日自可告蕝至索諾木為小
金川主謀罪更浮於僧格桑昨阿桂奏到賊寨內有
若發兵來實在不得不抵當之語是逆酋公然欲與
大兵抗拒直認不辭若非乘此兵力進討金川直取
渠魁儘平其地更無中止之理即此時誘其出降就

勢縛取不過另備一策並非正辦也兩路官兵當此
天寒越險奮攻所至奏績朕心深為廕念現降旨加
賞一月鹽菜銀兩將此諭令溫福阿桂傳知各路漢
土兵練俾共喻卹勞鼓舞之意

丁巳

上諭軍機大臣曰五岱雖有烏拉齊習氣曾經閱歷行
陣昨在西路軍營尚無大過著加恩授為藍翎侍衛
派往南路交阿桂酌量差遣想此時五岱已至伊犁

著傳諭舒赫德轉飭五岱馳驛趕同桂林前往

同日阿桂奏言

臣

於本月十三日子刻派令侍衛

三寶科瑪守備馬廷隨進至西山之邦甲山梁章

京圖欽保札什守備崔文傑沿溝而上從邦甲山頂

繞出賊後合兵攻擊至巳時將邦甲山梁石城大

礮及各石卡奪取遊擊谷生琰沿河進攻策爾丹

色木之喇嘛寺而已克邦甲之兵向下攻賊衆潰

逃官兵追殺頭人一名將策爾丹色木喇嘛寺奪

取札什馬廷隨復進取喀爾將山頂後面之德公
寨碉房一併攻克維時臣已令明正土兵預備皮
船即派守備鄂輝九齡等帶領川楚兵丁督同巴
旺布拉克底土兵渡河直攻東山梁下拉宗碉寨
將山梁大戰碉並山溝內及山坡上各碉房攻取
又進至拉約焚燒七寨番人跪懇投降而翁古爾
壘之前尚有高峯賊人據以窺伺今因後路將斷
亦於是晚越山潛遁統計東西兩山梁凡攻克碉

卡寨房三百餘間土守備阿忠保又於是日進攻
西山梁後之登藏寨而東山梁官兵復與明正土
兵督率約約投降番人攻至宅壘焚燒寨落宅壘
番人亦求投降番計此二寨男女老幼約二百戶
精壯番丁二百餘人伏查僧格宗一帶為小金川
西南門戶田地稍饒是以戶口最多碉寨亦最稠
密此次番人接踵乞降則小金川人心潰散情形
可見臣屢奉

諭旨以番衆投降即予撫輯現獲活口供稱頭人有私投出去總為官兵所殺之語藉此愚弄挾制若使番衆知拒守必加駢戮投順即予全生自當更為解體但番情詭譎未可深信隨將拉約宅壘兩處婦女老幼酌派明正及巴旺布拉克底土兵看守外其精壯番丁即令各土兵分隊管束隨營行走以便防制至西山梁之後處處與金川接壤經臣派兵分布防範并折毀攻得各處碉寨使其不得

乘間佔踞再此次攻得西山邦甲等處擒獲活口
內雅瑪一名年已五十餘懇求將此一帶番衆招
撫投降現在帶同攻勦奏入

上諭內閣曰據阿桂奏攻克東西山梁之邦甲拉宗等
寨拉約宅壘番人望風投順覽奏深為嘉悅阿桂董
率有方在事官兵疊著勞績均著交部議叙其打仗
受傷弁兵及陣亡土等並著查明咨部賞卹

上諭軍機大臣曰阿桂攻克邦甲拉宗等處情形一切

籌畫調度深合機宜惟處置降人一節最為此時緊要關鍵殺降本非行軍所宜且恐番人因此生變轉以堅其固守之志所有拉約宅壘老幼婦女自應宣諭安撫俾獲寧居其中丁壯可用者察其心無反覆隨營驅遣既可資其嚮道且使傳述中朝撫輯降衆之恩俾為賊拒守之人望風解體實為事半功倍阿桂所辦甚屬妥協西路此際已直取明郭宗遇有投誠乞降者溫福等即當仿此辦理至阿桂奏到擒獲

賊番噶勒丹彭等訊有金川頭人帶兵防守美諾之
供可見索諾木力為謀主欲於僧格桑敗亡之後併
吞其地是兩酋必須一鼓勦擒更無疑義且摺內所
稱西山梁後處處與金川接壤則現在攻勦助逆之
兵即為催折索諾木羽翼之要策固不待收得美諾
時始圖另起爐竈也將此並諭溫福等知之

同日阿桂又奏言汗牛地方南接明正東接木坪
西接索布大寨及仲濃卡了扎哇窠達烏等處西

北即通美諾但自明正之索布進兵程途頗遠即
由木坪前往亦復不近現在大營兵力不便更分
一路且另設臺站夫役亦難猝就臣一過僧格宗
則汗牛與美諾之路已斷或勦或撫自當易於籌
辦奏入

上嘉之

己未溫福豐昇額奏言臣等於本月十五日晚分
派官兵潛赴南岸趕搭橋座海蘭察德爾森保等

渡河直上南山攻得布喇克札喀爾二寨牛天昇
及章京德保等自達克蘇山脚進奪明郭宗直取
德木達寨額森特帶兵於夜半渡河至南山納拉
覺將賊寨及各碉卡奪取進至格實迪其時馬彪
等復自上壓下夾攻將各碉卡佔據哈國興於夜
半渡河由南山鄂爾濟上攻將各寨及卡座奪取
此次共取碉卡九十餘座現於附近明郭宗地方
移駐大營趕運礮位以便轟摧一面偵探繞道以

圖直攻美諾奏入

上諭內閣曰附近明郭宗一帶山梁山溝及沿路碉卡俱經攻取溫福等及在事官兵交部議叙其有陣亡受傷兵練並著查明咨部卹賞

庚申

上諭軍機大臣曰昨阿桂奏攻克邦甲拉宗等處碉寨有番衆投降一節辦理甚合機宜已有旨傳諭並令溫福等一體照辦矣現今兩路兵威大振番衆乞降

者必多急宜設法安撫並擇其丁壯可用者隨營驅遣俾逆酋不得以投順亦難免死之言蠱惑其衆但賊人狡獪百出一時畏威窘迫不得不以歸附求生旋或繫念故居親屬易於生變且安知逆酋不令其詐降入營乘機觀釁設使對仗時失於防範致降又復有逃叛甚至倒戈相向尚復成何事體溫福等務宜先事隄防撫輯固不可不周而稽查尤不可不密況此時小金川之拒守者多係金川賊兵其中不無

因敗來降將來接辦金川應即用此法同以加恩撫
綏解散逆黨並以留心防備早破其奸庶肘腋無稍
疎虞而先聲所至番人自知棄逆効順溫福阿桂等
皆宜善體朕意熟思審處並密諭各路將領默為理
會毋令稍涉聲張將此再行詳悉傳諭知之

臣等謹按大軍進勦小金川前經奉

旨以各寨番人赴營請降仍予安居樂業迨拉約宅壘
諸番扶老攜幼相繼歸誠復有設法安撫隨營

驅遣之

諭至於番情易變恐有繫戀故居及乘機觀釁

勅令將軍大臣先事隄防仰見

睿慮精詳無微不至其後西路軍營防範不嚴致降番
得乘間勾通轉相煽誘又因派兵搜索寨番衆驚
疑猖獗四起隄防之不密撫輯之不周

聖明坐照萬里早在目前矣

十二月壬戌舒常奏言

臣

查頭敵大碯賊番防守

愈密須用大礮轟擊但所調銅片礮匠二十餘日

尚未運到

臣

遙望日旁冰雪較薄且賊既併力據

守達爾圖山梁或乘其不備攻得險隘亦可由此

進勦當即遣人探看據稱日旁之冰雪間有消融

賊番較少且綽酋亦願前往

臣

於十四日戌刻令

叅將馬應詔都司伊蘇泰等領兵一千七百名星

夜繞道乘賊未覺奪其要隘

臣

仍帶領官兵施放

鎗礮牽制賊人嗣據馬應詔等稟稱日旁一山相

連綽斯甲布東南地界自山頂而下層接戰碉十
一座其西密樹陡岩難以直上公同商酌先取要
口戰碉二座即於十五日子刻派令伊蘇泰由左
進攻千總廖志學等帶兵接應丑刻直撲賊碉賊
番擲石放鎗抵禦我兵奮力攻撲至寅刻克獲東
邊戰碉一座殺賊多人生擒七人餘俱奔遁隨合
力圍攻西邊碉座賊從山上各路齊集來援各碉
內亦聯絡死守我兵仰攻難以久持一面令將所

獲大礮折毀一面將兵挨次撤回

臣

等查此路漢

土官兵營中現存六千五六百名若分路攻勦兵力不敷因擬於俄坡日旁西路中擇一易於得手之地將兵四千餘名併力進攻又酌留兵二千名據守一路分掣賊番之勢茲日旁一路奪得一礮尚非要隘

臣

已飛飭馬應詔相度情形可進則進如於事無益勿使有用之兵置之無用之地俟稟覆到日妥酌辦理奏入

上諭軍機大臣曰舒常奏攻克日旁山口東邊碉座擬
於俄坡日旁兩路擇一易於得手之處進剿所辦甚
是綽斯甲布一路原為宰制賊勢使其撤兵自衛起
見將來迅擣美諾僧格桑既已殄滅即當進剿金川
如量度此路必應進兵再為厚集兵力熟籌妥辦此
時不宜冒險深入致有疎虞自應如舒常所奏蹕探
道路審擇而行

平定兩金川方畧卷四十三

欽定四庫全書

平定兩金川方略卷四十四

十二月癸丑阿桂奏言自邦甲前抵納圍納扎木
一帶其中有都恭一處臣令明亮督領官兵于十
一月十七日分為三路並進章京圖欽保遊擊谷
生琰等攻得山坡碉卡侍衛德赫布千總劉世勳
等由山梁直攻石城金川賊衆悉力拒守我兵三
面合圍並壘石卡逼賊是夜亥刻賊皆棄城奔竄

至十八日併得日木則札爾瑪等一帶碉寨百餘處亦俱奪取以都恭山梁以下之拉咱寨經守備劉倬崔文傑攻取都恭以上之丹札地方亦經劉世勲等攻取明亮永平等復攻得噶察丹嘉碉寨其東山面經章京拉布東阿守備鄂輝李植善帶兵順河進取茨寨榮寨並處前後共收獲降番六百餘口攻得碉寨七百餘間佔據山梁三道至僧格宗相去數里尚隔一河其官寨在於峯巒特起

之處四面峭削僅有螺旋細路

臣

密令拉布東阿

李植善隔河察看情形與巴旺布拉克底頭人雍

中爾結等定議十九日亥刻用皮船過河分為兩

路潛至碉房下而西面之劉倬崔文傑亦帶兵壓

至僧格宗官寨後一面攻擊一面繞截去路賊人

始猶力拒及見我兵將次合圍即拆毀寨後石牆

順河逃逸遂將大戰碉一座及平房小碉百五十

餘間克獲

臣

侯明亮等所帶官兵蔣抵僧格宗酌

量留防後路一面直攻美諾奏入

上諭內閣曰僧格宗距美諾不遠係小金川險要門戶賊人負隅拒守甚堅阿桂殫心籌畫將士用命奮勇爭先連日攻克要隘復乘其不備黑夜分路潛師襲擊賊人棄險驚逃乘勝克捷覽奏深為嘉悅阿桂及在事將弁兵練並著交部從優議叙

上又諭軍機大臣曰僧格宗係賊巢門戶地勢極為險今我兵於黑夜分道深入毀碉殲賊從此直搗美

諾小金川之事自當剋日告歲皆由阿桂籌畫調度
悉合機宜是以臨銳摧堅要塞應手而得著賞御用
黑狐冠以示獎異所有應行優叙之將弁兵練阿桂
可查明功績等次各部辦理其所奏進取僧格宗時
巴旺布拉克底頭人雍中爾結等與我軍定議前進
頗見誠心效力並交阿桂酌加賞賚

上又諭內閣曰明亮著加恩授為副都統遇有缺出即
補

同日阿桂又奏言臣查明正土司甲爾叅得沁前
此曾到軍營今聞小金川汗牛一帶可以招撫投
誠是以差往查辦奏入

上諭內閣曰明正土司甲爾叅得沁帶領所屬人等奮
勉出力著加恩賞戴花翎並賞給佳木拜屯名號以
示獎勵

同日阿桂奏言查果洲山後係四月間叅將薛琮
等失事之地茲經官兵攻得察看山巖河灘之上

尚有前此陣亡官兵骸骨當令通行埋墓並令總兵英泰王萬邦前往祭奠奏入

上諭曰是當為共塚如葉爾羌之例祀薛琮等

同日阿桂又奏言南路由章谷起至東面山後即係小金川汗牛地方計長百數十里皆與賊界相近必須留兵防守而翁古爾壘至僧格宗六十餘里其中納圍納札木等處係通金川大路防守亦屬緊要現在南路打仗之兵不過數千因於達烏

等處守兵內酌量撤出並遵

旨將無關要隘地方兵丁添為勦擊之用至緝斯甲布

革布什咱兩路之兵原為牽制金川賊勢今

臣攻

克僧格宗正進攻美諾之時舒常前奏添兵一節

勢不能行俟小金川事竣再將合勦金川之事籌

畫辦理奏入

上諭軍機大臣曰西南兩路官軍深入正值需兵緊要之時斷無令此要路之兵而攻不能入之地朕屢次

降旨令舒常相機辦理今阿桂奏到情節均與朕旨
符合不但現在情勢如此即擒獲僧格桑後接辦金
川亦祇須溫福一路阿桂一路豐昇額一路舒常則
令其助豐昇額進兵足矣著傳諭阿桂善為籌畫速
抵美諾縛取逆酋舒常但以分賊兵勢為要著切勿
冒險輕進致有損傷再此次官兵攻取僧格宗拉布
東阿李植善尤為出眾應否陞級巴圖魯號著阿桂
查明具奏其餘各員並著一體查奏

同日阿桂又奏言綽斯甲布一路進兵目下雖為牽制金川賊勢但小金川尅日滅亡即應接辦金川寧遠府知府盛英於乾隆十二三年間在噶勒塔爾資隆辦理糧務又久任打箭爐同知與工噶諾爾布及各大頭人向俱熟識於撫馭事宜頗知竅要現在總理南路軍糧因令其於查辦糧臺之便前赴綽斯甲布駕馭該土司等並札囑舒常虛衷詢問酌量辦理均奏入

上嘉之

同日阿桂又奏言據章京拉布東阿守備鄂輝報稱十一月十六日有小金川賊番搶奪拉約等寨經降番雅瑪率衆擊退雅瑪帶有鎗傷等語又是日至十九日有喇嘛番民等攜帶大小男女三百餘口陸續來投臣逐一詢問多係舊時卡了納咱墨壘一帶之人據稱僧格桑已往布朗郭宗念大經令頭人七圖安堵爾留守美諾又聞金川派出

頭人阿木克爾鄂思嘉達爾日阿桑及德韓爾額
格色木五人帶兵千餘在納圓納札木一帶據守
索諾木又有搶回伊姊恐僧格桑跟去之語查自
達烏至僧格宗順河直進計程六十餘里若從山
上繞行即有七十里之遠仰蒙

皇上威福番人懾我軍聲節次投順其年力精壯者仍
分隸屯土各隊帶領打仗其餘老幼婦女即令各
歸舊寨釋其中年老衆所信服者作為寨首暫行

管束奏入報

聞

同日劉秉恬奏言現在官兵攻克僧格宗其地距達烏六十餘里臣親往查看酌定程途適中之地復於策爾丹色木安設一站以便轉運至策爾丹色木現有喇嘛寺一所即將運到米石收貯寺內更得藉以蔽風雨而資防衛再查僧格宗及附近之納園納札木等處軍糧乾隆十二三年係由西

路饋送運價較省今由南路支應道遠站長俟攻
克美諾之日將此一帶軍糧仍歸西路支放則輓
運便易而錢糧亦可節省奏入

上嘉之

同日劉秉恬又奏言革布什咱一路吉地丹東係
存糧之處由吉地丹東至甲爾壘壩經臣飭令該
糧員購辦烏拉按站滾運至綽斯甲布一路木池
為存糧之處由木池至宜喜山梁現以長運烏拉

運米至覺木交地方令餘丁等背至山梁但查綽
斯甲布距內地較遠從前係用本處蠻夫背運此
次自應照前辦理奏入報

聞

乙丑溫福豐昇額奏言明郭宗北有寧扎山西南
有公雅山賊於兩山對峙處築碉拒守明郭宗即
在其間臣等於十一月二十一日令海蘭察哈國
興額森特襲擊公雅山進至山頂佔據卡座臣等

現在進攻明郭宗一面遣人偵探如有自公雅山頂直達美諾之路即潛越明郭宗往攻美諾奏入上諭軍機大臣曰溫福等攻取明郭宗西南公雅山在事大臣官兵均屬奮勉著暫交軍機大臣存記俟攻得明郭宗一併議叙其陣亡受傷人員即著確查造冊送部議卹至陣亡之護軍校阿格拉克護軍博和爾岱有無子嗣並交軍機大臣查奏再溫福奏訊據賊番供有索諾木派兵二千欲由拉覺木地方斷官

兵後路之語兜烏既為吾有賊何得犯山頂之寨此
必係從別斯滿而來則防備此路甚關緊要著傳諭
溫福豐昇額留意辦理

上又諭軍機大臣曰黑龍江將軍送到打牲處擬陪駢
騎校之領催等入材均屬可觀著發往軍營於溫福
阿桂分路進兵時酌量分帶其派出帶往之三等待
衛神保蒙庫阿亦著賞給緞疋銀兩即令起程

己巳文綬奏言咱瑪山一路夫糧據糧員具報現

有存積而每日過雜谷腦米麪約計四百餘石至

西路資哩寨亦有存積米石先經臣於卧龍關存

米內飭撥由站運赴軍營計可支至明年二月臣

回省後又經續辦直運鄂克什足資儲備其南路

綽斯甲布革布什咱及章谷卡了均有存糧現在

沿途趲運者據瀘定橋站員驗報每日過米五百

餘石又噶勒塔爾資隆之米除逐日轉運外並添

覓烏拉分運章谷卡了綽斯甲布革布什咱等處

儲侍亦可日增奏入報

聞

同日

上諭軍機大臣曰昨阿桂奏報攻克僧格宗直壓美諾
不過數十里小金川已失南路之隘其西路明郭宗
之賊必當膽寒勢解但前據賊番雅噶爾供稱逆酋
在布朗郭宗底木達等處恐其預為三窟之計且路
通金川即可由彼竄逃則底木達一帶防守必堅董

天弼所帶兵力未免稍單必須添兵夾擊溫福阿桂
兩路官兵會合之後如已擒獲逆酋則底木達等處
不攻自潰若逆酋與其父澤旺同匿底木達溫福等
即由美諾通底木達正路進剿並著豐昇額帶兵五
千速赴董天弼一路合力夾攻俾逆酋難于兼顧併
可絕其外軼之路但須尋覓間道迅速前往不可仍
由巴朗拉維州一帶曲折迂迴致有延緩豐昇額臨
時與溫福阿桂熟籌竭力為之至處置降人一事已

屢次傳諭兩路仿照阿桂前奏而行並令隨時留心
防察昨阿桂奏僧格宗之捷其隨營出力之雅瑪等
有打仗傷亡者可知伊等歸順自出誠心大兵乘勝
深入降附日多急須設法安插其隨營者自應與土
兵一例其不隨營者亦無須取給糧運以資養贍溫
福阿桂等即當審酌與金川隔遠之處及非官兵緊
要後路令其各安耕種如力不能自給者不妨聽其
下壩傭工自覓口食至其所居之地祇可擇頭人中

良善者暫為管束而投誠之大頭人及小頭人桀驁者必不可使與新降番衆同居致滋事端惟當令其隨營効用並諭以如能出力奮勉將來均可承受大皇帝恩典俾益堅其去逆效順之心於安撫駕馭事務方為合宜將此並諭董天弼知之

庚午阿桂奏言官兵從翁古爾壘進勦番人陸續來投又聞宥以不死投誠益衆統計河東河西兩岸碉寨相望人口幾及千餘但係老弱婦女居多

其精壯番丁不及十之二三據供僧格桑前日在
布朗郭宗今又回來且云若守不住美諾即退至
帛噶爾角克若再守不住即退守底木達布朗郭
宗至納圓納札木等處皆有金川人拒守今於彭
魯爾寨山梁修起木城有頭人七圖安堵爾在彼
居住等語臣仍照前籌辦所放寨首照屯弁之例
給與執照金頂以資管束奏入

上嘉之

同日阿桂又奏言據千總劉世勲土守備阿忠保等帶領屯兵攻取卓克寨明亮帶同章京札什遊擊郝壯猷都司許世亨分兵三路進攻古嚕賊番分為兩路由山梁下來衝突官兵先將中路賊番擊敗逃回死守其右山梁之賊欲圍官兵所佔石卡許世亨督兵奮力迎擊短接七八次又派陝兵二百餘名前往夾擊賊始潰逃遂將古嚕地方攻克又章京拉布東阿守備李植善收服鳩寨瑪爾

里寨番民八十餘戶日古嚕寨番民四十餘戶明亮收服僧木則等寨番民百四十餘口其布隆喀咱他克撒瑪爾里木巴里各碉寨亦均陸續來投查自策爾丹色木至僧格宗其中如噶察等處山崖峻削偏橋皆為賊番焚燬必須修理以利餽運其由達烏至僧格宗據侍郎劉秉恬察看應設糧臺二處亦經派員撥夫安設現在橋座糧臺漸已辦就竊思西山梁一帶惟納園納札木二處尚有

遺孽其地在僧格宗西北若俟盡數掃除恐延時
日自應先擣腹心迅攻美諾惟是西面山梁攻得
各取均須留兵今駐現派副都統書經安駐劄翁
古爾壘總兵英泰駐扎僧格宗其納木覺爾宗溝
口係通納圓納札木大路令總兵伊常阿駐扎而
僧木則一帶尤為緊要除派撥章京備弁等分防
各隘口外並令副都統永平統領駐守臣分布之
餘所存漢土官兵共七千名察看東西兩岸情形

即日調撥各隊親督自進奏入

上諭軍機大臣曰阿桂督率官兵不日攻取賊巢克建
大勛自有酬庸之典此時且不必交部議叙惟此次
打仗官兵有出色効力者著即查明咨部分別議叙
都司許世亨千總劉世勲奮勉出衆均著賞給巴圖
魯號許世亨遇有叅將缺出即行奏補其另摺所奏
雍中爾結色爾奔並著賞給巴圖魯號仍加守備職
銜賞戴花翎以示優獎現在南路已破僧格宗直抵

美諾查閱番人供詞有僧格桑到布朗郭宗今又回
美諾之語逆酋當此軍威逼近豈肯安坐受縛蓋由
平日禁錮其父甚且悖叛跳梁罪惡貫盈天奪其魄
致令株守美諾官兵得擣穴擒渠第該番所供有美
諾若破即退守帛噶爾角克再退守底木達我兵尤
當設法遮防偵其所向躡跡窮追務擒僧格桑以完
小金川之局方可接辦金川若徒得美諾空寨則小
金川一役亦未可云告歲也再如除夕元旦等佳節

人情於此時必稍疎懈恐賊番窺揣及此潛伺官軍
劫營滋事不可不慎重周防令狡計無從施展我兵
於此等日尤當乘其不備相機勦戮自更易於奏功
著傳諭兩路大營加意辦理

辛未溫福豐昇額奏言公雅山之前有木爾古魯
嘉巴日果爾烏谷三山下有大溝一道踰溝前進
亦可直抵美諾臣等於十一月二十八日子刻分
路進兵至天明時哈國興海蘭察額森特等兵至

木爾古魯山脚奪取溝內賊寨及各卡座並將嘉
巴佔據派兵駐守奏入

上諭軍機大臣曰溫福等奏分派員弁攻取木爾古魯
山脚著暫交軍機大臣記檔俟攻得明郭宗時一併
議叙其陣亡得傷人等即著溫福查明咨部分別卹
賞

上又諭軍機大臣曰溫福等奏乾清門二等待衛巴雅
爾章京富爾賽都司曹順土都司職銜什朋隨營打

仗奮勉出衆均著賞給巴圖魯名號

上諭內閣曰陝甘餘丁於炎暑隨同正兵赴川未經攜帶皮衣較之他處餘丁情形不同時值冬令禦寒在所必需自應准其給與其應扣皮衣價銀著加恩於各兵凱旋後再行扣還

上又諭內閣曰溫福等奏委署章京瑚爾東阿巴克清阿於攻取路頂宗時奮勉出衆著授為本營副都統遇缺坐補

同日溫福豐昇額奏言臣等攻取達克蘇山上賊寨礮卡後即將攻打明郭宗之處再四熟籌若由南山進攻隅有山溝三道驟難越過其北山並無可通之路若一面從達克蘇山梁壓下渡河于南岸正路分兵數隊使之不能互相救援方可攻取當派兵七千餘名先令海蘭察牛天昇等領兵二千自北山壓下搭橋渡河直由南山之布喇克佔得固循梁壓取明郭宗臣溫福同海祿等前往接

應又令額森特等領兵一千自北山下渡河由納
拉覺仰攻又令總兵馬彪等帶兵一千前往南山
自格實迪直壓向下臣豐昇額同普爾普等前往
接應並令哈國興等領兵一千名渡河自南山中
間鄂爾濟仰攻將賊衆截斷併力攻取各路官兵
俱於十五日辰時起程海蘭察等于日出之前潛
至河岸趕搭橋座渡河即登南山攻取布喇克扎
喀爾二寨殺賊甚多牛天昇等自達克蘇山梁壓

下佔據明郭宗橋直取得木達奪獲碉寨三座石
卡七座有賊二百餘名出溝抵禦官兵奮勇擊退
其殺傷及落水淹斃者更衆臣溫福帶兵前往策
應會合一處自明郭宗東邊壓下攻打其額森特
等所領兵丁夜半渡河至南山納拉覺地方向上
仰攻克取賊碉十二座卡十五座臣豐昇額前往
合攻並分兵往勦格實迪時馬彪等所領官兵已
從格實迪上面壓下兩路奮攻賊俱棄碉逃竄至

哈國興亦自南山郭爾濟直上奪獲賊寨四座卡
五座臣等查明郭宗礪房堅大拒守賊衆又多若
督兵攻擊恐多傷損必先用大砲力轟一有摧陷
攻取方為有益奏入

上諭軍機大臣曰溫福等奏附近明郭宗賊番礪卡俱
行攻克現在進取等語溫福等此次分路派兵使賊
不能防備救援克礪殺賊直抵明郭宗用砲摧攻所
辦皆合機宜至伊等擒獲番人所稱僧格桑在布朗

郭宗念經同老土司商議之語看來賊勢窮促窘迫
必由彼逃往金川大兵一抵美諾若即獲僧格桑固
為美事即或僧格桑遁去而小金川已被大兵佔據
從此直搗金川不惟僧格桑在所必俘即索諾木亦
將焉往著傳諭溫福豐昇額等惟有速蕩小金川巢
穴佔據地方加意相機辦理此時當已克明郭宗往
攻美諾得有捷音即行速奏

上又諭軍機大臣曰近日官軍屢有克捷已拒賊巢不

遠阿桂攻克僧格宗之後業與溫福寄信其間自必有路可通溫福等如審度明郭宗賊衆抵死拒守猝難攻拔或可一面攻擊一面另為踴探路徑直擣美諾則明郭宗可以不攻自潰此際難以遙定著傳諭溫福等熟籌妥辦

壬申

上諭軍機大臣曰阿桂解到小金川投稟番人薩斯嘉交軍機大臣詢取供詞據稱美諾至僧格宗不及半

月路程中隔一河冬天水淺亦可過去等語南路官
兵既攻得僧格宗距美諾不遠此河在所必經其水
淺處是否可涉阿桂等自必遣人踣探但薩斯嘉現
有此供著即寄知軍營以便相度進取又所供美諾
可通金川之路數條僧格宗一路可由納園納札木
過去等語阿桂亦當稔知並著將薩斯嘉原供抄寄
溫福等知之

平定兩金川方畧卷四十四

欽定四庫全書

史部

平定兩金川方略卷四十五至
七

員外郎_臣顧宗泰覆勘

總校官原任侍講臣王燕緒

欽定四庫全書

平定兩金川方略卷四十五

十二月全酒

止諭內閣曰西南兩路軍營音信已通自此合兵會剿

平定小金川之後即應移師金川殲厥渠魁以杜邊

陲後慮此時兵糧充裕應分三路進發用壯軍威溫

福著授為定邊將軍阿桂豐昇額均授為副將軍其

將軍及副將軍之印著派侍郎福康安馳驛齎送即

以領隊大臣留駐軍營溫福一路著舒常為叅贊大
臣阿桂一路著海蘭察為叅贊大臣哈國興雖係綠
營漢員於領兵征勦之事曾經練習且原在乾清門
侍衛上行走與滿洲大臣無異豐昇額一路即著哈
國興為叅贊大臣分道並進恭行天討以期迅奏膚
功懋氛永靖

上又諭內閣曰舒常奏守備馬雄於進攻日旁礮卡之
時奮勇撲礮傷重身故甚屬可憫著加恩交部照陣

亡卹賞

同日舒常奏言綽斯甲布土司工噶諾爾布稟稱
金川索諾木遣其頭人來云自知有罪願將甲爾
壘壩退出等語金川如果能退出甲爾壘壩於進
剿大省兵力但由工噶諾爾布轉請焉知非試探
大兵是否實有剿滅金川之意是以臣駕馭綽斯甲
布諭知投降一事斷不能允必為各土司斬除日
後禍根以堅其助剿之志再據各木交糧員稟稱

二十三日夜有賊番數百人搶掠糧石因官兵施鎗抵禦賊番不敢向前適值途有馱糧烏拉為賊搶去牛隻經官兵追趕奪回並放鎗傷賊數名奏入

上諭軍機大臣曰索諾木黨逆助兵一載有餘現在尚敢劫掠在途糧石牛隻情甚可惡現在各處官軍均已調齊所撥軍餉已一千四百餘萬當此帑藏充盈即再需費一二千萬為一勞永逸之計朕總無所靳

惜蓋此事實有不容中止之處雖其地多山負險均可計取力勝非若緬甸之天時水土難以人力強為若持志稍有未堅遽圖歇手賊酋狡惡難移必致復煩軍旅非但不成事體而目前之費與現得之功皆為虛擲亦屬非計溫福等必能深體朕意不應復俟丁寧諄諭也再索諾木現請退還甲爾壘壩據綽斯甲布土司之意欲將計就計詎其退出即發兵看守其說不妨姑為允從但恐綽斯甲布尚未知官兵進

勦金川不滅不止或以餘孽未盡此後仍受其毒為
慮索諾木或又造為唇亡齒寒之說以金川若被官
兵攻破必將翦及各土司冀相煽惑舒常應以大皇
帝征勦兩金川原因其侵擾鄰封逞凶蠶食欲為爾
等剪除後害長享太平之福反復開導令該土司誠
心信服庶不受逆酋簧鼓益可堅其効用之心今工
噶諾爾布尚屬恭順因賞給名號緞疋以示獎勵並
發諭旨一道兼用清字蒙古字西番字三體書寫俾

中朝治普同文倍深感畏至將來攻取金川若應從
綽斯甲布一路進兵則必須阿桂前往於隨機制勝
之道自更周妥頃已有旨於各路將軍副將軍及叅
贊大臣均為派定其領隊大臣領隊侍衛亦為分派
另降諭旨或將來止須兩路則豐昇額哈國興等仍
隨溫福軍營以備臨時分兵之用所有定邊將軍印
及定邊右副將軍清字印已派福康安齎往溫福於
接受將軍印後即將現用之右副將軍清篆印移交

阿桂其發去之右副將軍清字印交豐昇額收領若
不分三路豐昇額之印無庸行用福康安已授為領
隊大臣其帶往之章京兵丁並交溫福等酌量派撥

同日

上諭軍機大臣曰綽斯甲布土司工噶諾爾布此次進
兵以來誠心奮勉毫無瞻顧甚可嘉尚著加恩賞給
緞六疋仍給尊追歸丹名號以示獎勵天朝用兵討
賊搗穴擒酋理無中止今僧格桑索諾木擾害各土

司其罪甚重若一日不滅各土司一日不安此番勦賊正使各土司永遠安生著將此意曉諭工噶諾爾布俾知感戴竭力一心以期掃殄永受天朝有加無已之恩

上又諭軍機大臣曰溫福一路派福興常保住已朗額森特阿爾蘇納為領隊大臣德爾森保賡音素普爾普已雅爾為領隊侍衛阿桂一路派興兆奎林齊里克齊明亮華善舒經安音吉圖為領隊大臣三寶蒙

古爾和隆武烏爾圖納遜為領隊侍衛豐昇額一路
派董天弼福康安博靈阿永平伊常阿德赫布為領
隊大臣彰霽阿爾都明仁為領隊侍衛其餘提鎮侍
衛章京等著溫福等公議分領若止分兩路進兵其
豐昇額隊內人員著歸溫福一路行走

丙子溫福豐昇額奏言臣等於十二月初三日派
哈國興海蘭察分路進兵奪取賊卡木城將嘉巴
山脚佔據至初五日午刻派兵往攻明郭宗普爾

普巴雅爾等帶兵先逼南寨大礮海蘭察哈國興
額森特等繼至賊衆驚亂棄礮逃竄官兵直入寨
門其寨內西南有念經樓周圍皆係小礮見紅衣
賊目領衆據守臣等派兵圍困截其去路一面搜
勦附近賊寨是晚於樓外預備木柴火藥一時火
起樓內賊衆均被焚死現在整兵攻取日果爾烏
谷山脚直壓美諾賊巢

溫福豐昇額又奏言臣等恭誦

諭旨知京師三次得雪各省均獲豐稔實為上瑞即臣
等軍營係邊外番地每當冰雪寒冷倍常今自攻
破路頂宗以來連旬晴霽官兵雖日夜接仗然士
氣奮揚並不致有疲乏此皆緣

天心助順無論內地邊陲庶徵疊見從此邊隅永靖徼外
人民長享安樂實皆仰托

聖主如天之福臣等欣聞各處豐年之兆復目覩行間
士卒感

恩振奮情形實為忻忭均奏入

上諭內閣曰溫福督兵進剿攻克賊酋緊要門戶從此
直擣美諾自可迅奏膚功溫福豐昇額著交部從優
議叙其在事將弁兵練奮勇出力均著查明咨部一
併從優議叙至間有陣亡受傷兵練亦著查明咨部
卹賞再瓦寺土都司職銜噶實卜臨陣捐軀情殊可
憫昨曾諭部議定土司加恩之例噶實卜應得卹典
即著照新例行

同日

上諭軍機大臣曰溫福等奏攻得明郭宗整師直取美諾覽奏甚為忻慰前據阿桂奏報攻克僧格宗亦統兵進擣美諾兩路官兵乘勝深入僧格桑若即成擒則布朗郭宗底木達等處止一老病之澤旺不難傳檄而定唯汗牛一帶為通我兵後路阿桂自必密訪要隘派兵守禦不使賊衆得以潛軼但偏隅遺孽亦不容聽其久匿滋事諒其地不過一二番目固守不

值復煩兵力而當此賊衆膽落之時即為設法招降
自無不畏威景附阿桂其詳酌妥為之至平定小金
川後官兵分路進剿金川則美諾一處尤關緊要且
係接應饋糧總要之地撫輯新附番衆亦有應辦事
宜必須大員彈壓經理著劉秉恬駐扎美諾督理糧
運及處置降番諸務其協同留駐之武職大員並著
李煦帶兵防守聯絡聲勢再哈國興之子哈文虎兵
部帶領引見已加恩用為守備發往四川可諭哈國

國令其益加感奮又溫福等另摺所奏軍營晴霽和暖士氣倍揚天時人事信而有徵朕覽之益深寅畏不敢稍存自滿之心溫福等愈當戒滿持盈共深凜畏速建大勲以副恩眷

上又諭內閣曰普爾普已雅爾領兵先登克取明郭宗南大寨烏什哈達額爾特向下攻擊均係奮勉出衆普爾普烏什哈達著加恩賞給副都統職銜已雅爾著授為頭等侍衛額爾特著授為二等侍衛

丁丑阿桂奏言僧格宗東岸山脚直挿河流必須
由西岸前至科多地方搭橋再過東岸方能前抵
美諾先經派出員弁搭成橋座臣於十二月初四
日子刻派德赫布三寶章京拉布東阿扎什都司
劉倬守備李植善帶兵作為前隊由河東進發又
令章京圖欽保札勒桑侍衛科瑪遊擊谷生琰帶兵
作為二隊並派明亮齊里克齊繼進均由河西科
多過橋至河東過橋此一路均極峭仄且被賊番

剗斷行走甚為艱險官兵奮迅直前進至喀咱木
籠山梁又進至奢壘山梁初五日丑刻分兵三路
進取池木官兵奮勇衝突賊不能支遁往美諾計
奪得碉房三十餘間官兵追至美都喇嘛寺後佔
據山梁距美諾不過三四里但美都喇嘛寺在美
諾之後形勢較高現在賊人悉衆屯聚若佔據此
寺則賊寨易於攻取其賊寨之前河上橋座名薩
穆果穆為通金川工噶爾拉要路據守此津亦可

絕其逋逃之路臣已派侍衛章京等領兵迅速前進奏入

上嘉之

都喇嘛寺山梁之上望見美諾官寨堅固異常而賊寨以西薩穆果穆橋兩旁礮座亦均有賊番預備抵禦與賊寨互相犄角明亮等察看情形即乘勝分兵直攻美都喇嘛寺據高壓下德赫布等從山梁冲壓和隆武等沿河岸進攻金川賊番約計

三四百人前來救援官兵上前勦擊賊番捨死迎敵潰而復合數次至力不能支始行潰敗官兵分頭追趕上下山坡共殺死八九十人餘衆遁入賊寨據守其寺內尚有賊番官兵衝入趕殺盡皆殲戮將喇嘛寺佔住官兵既得此寺進逼美諾官寨寨內放鎗抵禦甚急而橋旁礮內賊番所放之鎗又皆一一可及官寨牆根與寨內合力拒守而官寨對岸即係彭魯爾八寨賊番又隔河排鎗擊打

以為賊寨及橋旁各碉應援惟時已屆戌刻即派官兵拏卡圍賊守至四更察看賊番鎗勢稍懈明亮和隆武三保德赫布等由寺分路進攻賊番一面放鎗抵拒一面捨死衝出官兵乘夜邀截追趕殺賊更多其橋旁碉內之賊亦俱棄碉遁去初六日寅刻已將美諾各碉寨全行攻取並擒獲喇嘛及男婦等三十四名明亮等帶兵入寨各處搜查即將所拏活口嚴訊僧格桑實迹據稱初五日南

路官兵將上美都寺山梁之前賊酋見勢危急一面留兵拒敵一面帶領小女人及頭人伴當等由寨後坐船過河聽見要逃往布朗郭宗不知真假等語明亮等即將喇嘛寺及官寨封固并派弁兵看守是夜聽見明郭宗一帶鎗礮不絕知西路尚有賊番拒守德赫布於既得官寨之後帶兵數百名前往迎接辰刻途遇溫福豐昇額臣亦已將僧格宗納木覺爾宗一帶防範金川事宜詳悉指示

交與總兵英泰伊昌阿於是日移營現與西路官兵均在美諾駐扎至官兵自連日進攻以來人人奮勉軍鋒所至無堅不克內惟守備牟天德及土守備阿忠保得有鎗石傷此外兵丁陣亡者十餘人受傷者四五十人現在查明咨部查僧格桑罪大惡極實為覆載所不容今即鋌而走險希延殘喘亦斷無不就擒拏以彰顯戮臣與溫福豐昇額整頓兵力迅速督兵搜捕如或竟入金川亦即遵

旨直勦金川並籌辦底木達布朗郭宗一路以為先掃

小金川之局奏入

上諭內閣曰阿桂統率官兵由達烏踰險進攻連奏克捷即於一月之中直擣美諾雖僧格桑暫時鼠竄勢將釜底游魂不日即可就獲而賊巢已破我武惟揚阿桂調度有方懋績丕著著交部從優議叙其在事出力之將弁兵練並著阿桂查明咨部一併從優議叙

同日阿桂奏言竊查兩金川逆酋罪惡貫盈神人共憤我

皇上義征不諛上協

天心不獨各省豐收即川省秋成比較前年加倍且成都向少冬雪茲者亦報祥霽將見明歲豐收於茲可卜而西南徼外往時雨雪最多者今則仲冬以來風日極為晴朗軍士行走進攻非獨無虞凍滑抑且不患祁寒似此

天助庥嘉悲賴

聖明福庇則乘勝進兵掃靖小金川後并攻金川逆豎
自必易於歲事奏入

上諭曰實堪欣慰亦爾等忠勇所感也勉之

同日溫福豐昇額奏言明郭宗至美諾尚隔日果
爾烏谷山山下沿河有馬哨一寨臣於十二月初
六日黎明抵寨賊衆均已竄逸督兵前進辰刻即
抵美諾其時阿桂所奏明亮德赫布等領兵先到

據稱僧格桑業於昨夜逃去又訊據番衆供稱僧格桑從達巴溝逃去此溝內有兩路一通金川之功噶爾拉一通布郎郭宗等語查達巴溝之西山名彭魯爾沿溝前至帛噶爾角克碉往西即金川地界往北即布朗郭宗臣等即於是日晚由達巴溝分路搜勦其由軍營至卧龍關臺站軍火是事宜前經奏明交總兵富紳專管外現今提督李煦在明郭宗一帶留駐巡查後路奏入

上諭軍機大臣曰僧格桑逃往布朗郭宗之說大約十居八九兩路官兵既已會合尤當迅速躡追其由美諾至布朗郭宗路徑自多溫福等或分路夾攻或合力併擊自應就該處情形善為籌辦如僧格桑一經就獲即遵前旨選派妥幹文武大員嚴加管押檻送京師設僧格桑竟向金川逃匿即宜統兵速勦金川將索木諾一併擒縛以完此局至官軍三路分進溫福等三人即與派定各路叅贊大臣及領隊大臣等

分兵前往若止須兩路則豐昇額仍照前諭隨溫福同往總之所辦同此一事將來大功全藏勞績維均朕策勲行賞一秉至公必不肯存歧視溫福等務須和衷共濟無分彼此畛域方合大臣公忠為國之正道尚其善體朕意悉屏嫌疑以副優眷

上又諭曰土守備阿忠保於此次攻取美都喇嘛寺手及賊人十餘身受石傷數處著加恩賞帶孔雀翎並給與巴圖魯名號

上又諭內閣曰阿桂奏副前鋒叅領札什三等侍衛科瑪自翁古爾壘至美諾領兵奮力進攻額魯特披甲貢楚克於攻取邦甲山梁時因賊放鎗抵禦奪鎗殺賊等語札什著授為正前鋒叅領遇缺坐補貢楚克著授為藍翎侍衛札什科瑪貢楚克並着加恩賞給已圖魯名號

上諭軍機大臣曰劉秉恬自派赴南路辦糧以來一切均能奮勉且由達烏親往美諾督率輓運不辭勞瘁

鄂寶在西路經理糧運亦能悉心籌辦妥速無誤並
著加恩賞戴花翎現今兩路軍兵會合溫福等帶兵
追擒逆豎即當乘勝直勦金川糧糈尤關緊要該侍
郎等益宜和衷商榷加緊轉運再前已降旨令劉秉
恬同李煦留駐美諾辦理降番等事此旨諒可先到
當此賊巢初克該侍郎更當加意妥辦從此實力宣
勤茂著勞績朕必加渥恩用昭獎勸將此傳諭知之
己卯溫福豐昇額奏言美諾至帛噶爾角克計程

一百二十餘里臣等於本月初八日自美諾率兵
趲行於初九日卯刻抵帛噶爾角克番衆跪迎道
旁據稱僧格桑於初六日夜至帛噶爾角克隨將
寨內大小頭人並妻子及牛羊物件帶往布朗郭
宗等語查達巴溝西通功噶爾拉若逆酋復向索
諾木乞兵相助賊兵必由功噶爾拉橫截我兵之
後臣等已派遊擊富敏泰等帶兵五百名於達巴
溝山梁留駐防範糧運臺站均可不致踈虞並一

面飛行董天弼令其一體嚴防尅期攻進至陸續
來投番衆通計十餘寨老幼男婦數百口遵

旨加意撫輯並留心體察將壯健可用者隨營差遣餘
俱暫令其本寨居住俟事竣後另籌妥辦奏入

上諭軍機大臣曰溫福等奏現在追截逆酋於初九日
抵帛噶爾角克帶兵前進阿桂得美諾後想尚須在
彼經理再行進兵溫福豐昇額立即統兵追擒逆豎
不令久匿遠颺所辦甚是其所派遊擊富敏泰帶兵

五百名於達巴溝山梁駐守一節亦合機宜唯所留之兵太少而帶兵之富敏泰亦未必能獨當一面此等緊要處所若得如海蘭察哈國興等駐守方為足恃但溫福現已帶往進兵想亦因此兩人於攻勦得力是以不令留駐此時亦可無庸更調著傳諭阿桂酌派多兵選擇練習可恃者一員於達巴溝山梁駐守仍將派出何人奏聞阿桂此時想亦已進攻布朗郭宗與溫福等或合或分和衷協力並諭昨降諭旨

就近妥酌辦理

平定兩金川方略卷四十五

欽定四庫全書

平定兩金川方略卷四十六

十二月庚辰阿桂奏言美諾為小金川適中四達之地雖經攻取而美諾以西之彭魯爾八寨尚為賊守迤北之別斯滿亦未投順其餘附近各碉寨均須招撫且自美諾經由崇德牛廠前往即係乾隆十二三年進攻金川喀爾薩爾一路距金川邊界不遠亦宜稍為布置況南路官兵在僧格宗所

支口糧業經用竣因道路崎嶇糧運未到亦俟襄
帶有資方能進發今彰魯爾八寨番人已就招撫
而附近明郭宗之達伊寨達克蘇寨噶沙里寨尼
雅布角寨並別斯滿五寨中之兩寨悉已撫定此
路軍糧又經侍郎劉東恬前來美諾趕辦米石足
敷支給臣酌留官兵札防範外即於十一日起程
前赴布朗郭宗查溫福豐昇額兩路並進所帶官
兵數目雖屬相仿而豐昇額一路與金川隘口相

通必須官兵續進更足以壯軍威而寒賊膽臣是
以從達巴溝分路即由豐昇額一路帶兵續進再
納圍納札木等處前此尚有金川賊番負固據守
現據副都統永平報稱賊衆自焚碉寨退守已界
臣仍飭永平等小心防範不致疎虞

阿桂又奏言小金川所屬地方汗牛最大東界木
坪南通明正其北直抵美諾計長二百餘里中如
榮榮等處形勢險絕即在卡了達烏之後前於明

正土司甲爾叅將沁來營時經臣諭令設法招撫
今據稟稱十一月二十九日入汗牛地界將

大皇帝好生德意廣為宣布其第一寨番民即已叩頭

悅服至十二月初五等日汗牛等十四寨均經投

順臣即飭令甲爾叅得沁派出頭人暫為管束奏

入

上諭軍機大臣曰阿桂奏籌辦美諾稍畢即於十一日
起程前往布朗郭宗所辦甚是與昨溫福等所奏即

由美諾前進追捕逆豎其遲速前後俱合機宜至所
奏撫定彭魯爾等寨極為妥協汗牛一帶業達明正
土司招撫更足慰懷該土司甲爾叅得沁即着阿桂
傳旨嘉獎俾其益知鼓勵惟據圖內地形別斯滿賊
寨均在美美卡之北為西路應防後路其距美諾較
遠因何得以併為撫定或係舊圖方向未確著阿桂
補繪呈覽又所奏豐昇額一路必須官兵續進是以
從達巴溝分路帶兵繼進一節所辦亦是再溫福等

昨奏於達巴溝山梁派員駐守因其地關係緊要曾諭阿桂添派多兵並令選派領隊大臣前往今阿桂既由達巴溝分路進兵則此一帶形勢皆所目擊尤應善為籌辦以期於事有益至金川賊衆焚碉而遁自必退守巢穴官兵既掃清美諾即日可勦金川如噶拉依勒烏圖等處雖向稱險隘諒亦與西路之路頂宗至明郭宗南路之翁古爾壘至僧格宗形勢相仿溫福等惟當堅持定見勦平金川擒縛索諾木方

為盡善

上又諭軍機大臣曰將軍大臣及侍衛章京等帶兵攻
剿若心存畏怯不戴翎頂固屬非宜但不留心防範
專務乘馬打仗亦有未便從前伊犁回部地方平坦
官兵均各乘馬尚無區別今四川軍營兵丁皆係步
行獨領兵之將軍等乘馬是使賊審易於認識得以
指準放鎗現在進剿金川著傳諭將軍大臣與賊打
仗時務須下馬步行並令巴圖魯侍衛章京等知之

臣等謹按軍營諸臣與賊接戰奮力進攻義無
旁顧我

皇上深慮將軍大臣乘馬指揮轉使賊審易識或致受
傷

特令下馬步行俾難區別仰見恫瘝在抱實於奮勇將
士念切如傷雖此種節目之微無不悉經

宵旰宜軍營內感荷

慈恩而殺敵致果倍加努力也

辛巳溫福豐昇額奏言臣等於本月初十日子刻
分帶官兵前進至寅刻抵大多喇嘛寺寺內喇嘛
一名捧佛出降且以寺內有僧格桑派來之金川
二百人請賞令箭一枝約為內應臣等察其情詞
屬實當即給予令箭令其還寺仍督兵加緊攻擊
頃之寺僧皆出內外合攻殲賊甚多遂進至木布
多又進至達克羅寨又進至布朗郭宗此寨周圍
計五六里戰礮房屋約千餘間我兵分為四路各

佔緊要隘口進攻自未至戍寨內火起賊番潰圍
而出我兵奮擊殲戮並據活口供稱桑格桑昨日
至布朗郭宗即令金川人將伊妻妾及心腹頭人
伴當等由寨後美卧溝送往金川今早聞官兵已
過帛噶尔角克碉即到底木達求見澤旺閉門不
令進見遣人語以惹下如此大禍我但死在此處
僧格桑憤恨將傳語之人殺於門外又聞官兵已
破喇嘛寺而西面喀爾果亦有官兵即從底木達

過河亦由美卧溝小路逃往金川等語臣等旋由
布朗郭宗過河至底木達佛倫泰巴延泰及阿爾
蘇納喬蘇爾張大經牛天昇等各路之兵陸續皆
到次日黎明進圍官寨澤旺出寨跪稱土司受
大皇帝深恩乃子僧格桑狂悖不法不能教訓罪無可
寬但求開一線生路等語隨派哈國興將澤旺看
守俟部署稍定即派委員解京請

旨治罪又別斯滿土舍安都爾及通事虎兒指稱澤旺

遣令到營請降但安都爾幫同逆酋抗拒應否送
京候

旨遵行其虎兒並跟役七名及連日拏獲各犯現在逐
一嚴訊辦理再投降頭人阿克里願差人將大板
昭頭人末利阿什咱等喚回隨派鄂克什通事賡
噶與阿克里所派之人同往並令董天弼來至底
木達會合至僧格桑所走美卧溝據番人皆稱此
路雖通勒烏圍但路甚險仄僅容單身行走且沿

途少水兵行不便等語查功噶爾拉係乾隆十三年進勦金川之路布朗郭宗迤西之簇拉角克溝有路可通功喀爾拉不須繞回美諾現今建昌道白瀛設站趕運俟董天弼兵到口糧敷用之時即由此路繞兵前進

溫福豐昇額又奏言小金川全境蕩平必須清查戶口察其地里形勢以為辦理善後之地董天弼雖打仗未為得力然在川年久熟悉番情臣等擬

留兵一千名今其帶領在布朗郭宗駐劄但查辦
戶口冊籍亦須文員協助革職松茂道查禮承辦
邊務向稱幹練現在咨明文綬飛調至營俾協同
董天弼逐度查看原有寨落入戶若干並現存若
干具山川夷險地土肥瘠凡有關善後事宜均令
留心體察俟勦平金川後與督臣等通籌全局詳
議辦理均奏入

上諭內閣曰溫福等奏由帛噶爾角克碉追勦攻得布

朗郭宗復進克底木達擒獲澤旺解京大板昭一路
亦遣人往諭現在籌辦追擒逆豎併勦金川前據阿
桂攻克美諾賊豎喪膽奔逃溫福等即督兵窮追蕩
平勦窟現雖喙走偷生而澤旺及頭人通事等咸已
就縛大板昭一帶接到檄諭亦可望風就撫小金川
全境底定朕心深為嘉悅溫福豐昇額著交部從優
議叙其在事出力之將弁兵練均著查名咨部一併
從優議叙

上又諭軍機大臣曰溫福等奏攻得布朗郭宗底木達等寨僧格桑之父澤旺業已就獲澤旺雖非首惡亦係大逆緣坐之人自當解京嚴訊土舍安都爾為逆黨濟惡要犯通事虎兒曾至內地今為賊酋出力管事即與漢奸無異均應解京治罪又跟役七名內如查有緊要人犯亦著一併解送其管解之員須選擇曉事人員飭令沿途小心防範毋致疎虞再從前屢據賊番供稱七圖安堵爾蒙固阿什咱二人係僧格

桑得用頭目向在美諾亦有言七圖安堵爾為逆首
所殺蒙固阿什咱思欲逃至內地其說雖在疑似之
間但小金川地方今已全定此二人作何下落或仍
隨逆首竄去抑實係一死一逃其逃者又往何處均
著溫福等確查具奏其岱多寺內喇嘛悉衆迎降奮
力殺賊溫福等應令其仍居寺內現在小金川收存
糧食足資養贍即按伊等舊有分例賞給至僧格桑
由美卧溝逃往金川索諾木見官軍追賊甚急禍將

及已且見僧格桑扶貲而行或留其貲財及伊姊在
彼將僧格桑獻出溫福等若能誘至襲捕最為妥善
設專差大頭目送出即將僧格桑及其頭目一併留
住擇其中無用番衆一人令其回巢諭以爾索諾木
之意不過以僧格桑為倡叛之人將伊縛獻即可完
事俟大兵既撤復出而吞併小金川之地逞意妄行
此等伎倆豈能在本將軍前掩飾今奉大皇帝威命
統率大軍分路聲討惟知督勵士卒掃蕩金川擒縛

索諾木兄弟以靖番夷而輯邊境如此覆檄方為合
宜並當徧告各路將士共知此意又另摺所奏清查
降番戶口此亦善後事宜必當辦及者但此時止可
云查明安撫令皆得所將來移駐綠營之事不可稍
有漏洩庶降番不生疑畏且使金川聞之共懷歸附
前已有旨令劉秉恬同李煦留美諾辦事令溫福等
奏擬留兵令董天弼帶領在布朗郭宗駐守所奏亦
是即可令董天弼留駐李煦隨營攻勦但僅留董天

弼同查禮商辦尚不足恃仍著劉秉恬會同董天弼
經理美諾一帶事務在番地審情董天弼固為諳習
其間緊要機宜仍責令劉秉恬實心酌辦其美諾各
處有通金川要隘應派官兵防守並著溫福等妥酌
派往

上又諭內閣曰大兵攻克美諾布朗郭宗底木達等寨
小金川之局業經全定計自辦理軍務以來一載有
餘一切緊要軍郵往來絡繹沿途臺站均能如期趲

達所有直隸山西陝西四川等省驛站官員著加恩
交部議叙其馳遞文報之兵丁人等並著各該督撫
查明給賞

甲申

上諭軍機大臣曰董天弼奏攻克大板昭木了寨等處
情形若於溫福等未至布朗郭宗之前督兵攻破賊
寨自當優叙勞績乃溫福等於初十日晚攻克布朗
郭宗十一日早攻克大板昭等寨則係十一十二所

奏攻克大板昭等寨則係十一十二兩日此乃賊衆
聞知大兵已得布朗郭宗等處勢難復拒因而畏懼
竄逃董天弼不過得其空寨而摺內尚鋪張派兵勦
擊欲居克獲之功總由沾染綠營惡習務為粉飾言
之能無汗顏朕於軍營功過悉皆核實豈為此等虛
詞所獲惟所稱誘賊出卡後土兵堵截卡門賊不能
退回驚惶被戮等語此等土兵尚屬出力著溫福等
查明量加獎賞又據奏如意壩以北地名喀爾薩爾

為通金川要口且係我兵後路現在分撥布置防範
等語此事甚有關係昨溫福等奏令董天弼駐守布
朗郭宗已允所請並諭令劉秉恬留駐美諾率同經
理著溫福傳諭董天弼務須實心妥辦勿再稍萌虛
偽故智以致貽誤干咎至溫福等昨奏僧格桑由小
路逃往金川自應帶兵尾追但路甚險仄僅容單身
行走兵行不便等語未免稍存畏難之見我兵此次
進剿經由險徑甚多何獨美卧溝難於前進且僧格

桑逃竄時送其妻妾先行並挾資財而去則此路亦
非人跡難通所謂賊能往我亦能往溫福等寧不知
此言若當攻克布朗郭宗之時即派兵往追其時距
僧格桑脫逃不過半日或可追及今既未辦及此祇
可付之已往不咎嗣後尤宜籌畫得當勿使坐失事
機

丁亥溫福阿桂豐昇額奏言川賊巢惟噶拉依及勒
烏圍為心腹之地其由攻噶爾拉進攻喀爾薩爾

係擣噶拉依正路臣溫福由此一路進勦其自僧
格宗經納圍納札木至當噶爾拉進兵亦係進攻
噶拉依要路臣阿桂由此一路進勦至舒常現由
綽斯甲布進兵其俄坡地方係徑攻勒烏圍近路
最為得力前此近有漢土兵八千名今於臣溫福
並董天弼所帶兵內酌撥漢兵四千土兵二千臣
豐昇額帶領由章谷吉地前赴綽斯甲布合該處
現有之兵並與舒常合力攻勦奏入

上嘉之

同日阿桂又奏言現在分兵三路並酌撤曾頭溝一路官兵以一半撥添綽斯甲布一半撥添功喀爾拉聲勢已為壯盛即臣所進當噶爾拉一路現有官兵萬餘除沙汰傷病外尚可敷用惟是分路輓輸糧運不無拮据臣三次到川於西南一帶道路遠近險易畧知梗概凡有便於輓運及可稍為節省者均告知侍郎鄂寶劉秉恬就現在局勢釐

定章程盡心經理臣即於十二月十七日由布朗

郭宗起程回至美諾僧格宗一帶亟整兵力迅速

進攻以為併縛兩酋之計至臣在南路時綽斯甲

布土司屢遣頭人請安稟話臣隨時駕馭察其頭

人頗為信悅將來進剿似可期其出力已將該處

道路形勢又土司番衆性情並從前節次籌辦緣

由逐一告知豐昇頗得酌量辦理奏入

上嘉之

阿桂又奏言臣查投誠番人原未可遽信現在揀其丁壯配入隊伍交與脩弁管領其老成者令為寨首以資約束伊等妻子均留本寨今查新附番人隨營打仗均有受傷陣亡其情狀似非虛詐但番人情性不常溫福等雖經

奏明令董天弼查禮查辦然尚恐不周現與溫福等商調五福來營稽查彈壓臣當面加指示令其遵辦留心密為防範奏入

上又諭軍機大臣曰前經降旨將各路叅贊大臣及領
隊大臣等均為派定此旨於十二月十三日發往計
二十二二十三等日可至軍營其時溫福等如尚未
起程自當遵照派定各路同往若已帶兵分進或程
途相距較遠更換未免費事不妨即令舒常為豐昇
額叅贊海蘭察哈國興為溫福叅贊阿桂一路即令
明亮為叅贊其領隊大臣等即照伊等所派分隊帶
兵毋庸復照前旨更換至阿桂奏稱安置降番一事

業據溫福等奏令董天弼查禮查明尚恐未能周到
現調五福來營分段稽查彈壓所辦亦是前因此事
關係緊要於溫福等未奏之先特派劉秉恬在美諾
布朗郭宗一帶經理撫輯今已將劉秉恬補授四川
總督仍令其在美諾等處董辦一切事務並令就近
督同日運將此傳諭知之

同日

上諭內閣曰文綬查審阿爾泰一案袒護欺飾著革職

交富勒渾審訊

上又諭內閣曰劉秉恬在美諾布朗郭宗一帶綜理彈壓所有四川總督事務任內交富勒渾暫行署理並督催內地續運糧餉俟大功告竣劉秉恬回至成都富勒渾再回湖廣總督之任

上又諭內閣曰阿桂奏前鋒叅領拉布東阿隨營打仗實屬奮勇等語拉布東阿著賞給多爾濟巴圖魯名號

上又諭內閣曰前經降旨令阿桂將攻克僧格宗之將
佐等查明具奏今據奏到雲南叅將郝壯猷在甲爾
木山梁及美都喇嘛寺督兵殺賊甘肅都司神保於
進攻甲爾木及攻擣木池美諾等處亦屬奮勇等語
郝壯猷神保均著賞戴花翎以示獎勵

溫福豐昇額奏言小金川演化禪師印係康熙五
年所給現從澤旺處收取送京又於布朗郭宗寨
內查出銅印三顆一鐫崑州長官司印洪武十一

年造一錫楊塘安撫司印永樂四年造一錫別思
寨安撫司印宣德十年造檢查四川通志並無此
三土司之名詢訪土人據稱小金川地方原係五
土司之地被小金川吞併別思寨一印即係土舍
安都爾先世之物其餘四土司業以年遠無從稽
考奏入報

聞

戊子舒常奏言本月初三日早見有賊番五六百

人分為三隊從東澗密林前來滋擾臣即督同鎮將分路壓攻賊見官兵勇猛仍由樹林中竄回負險次日又有賊番潛從西澗林中分隊而來臣同馬彪等率兵放鎗迎擊斃賊十餘人餘俱奔竄此兩次弁兵間有陣亡受傷奏入

上諭軍機大臣曰前此舒常一路不過牽綴賊勢所派兵力原覺稍單今分路進兵綽斯甲布一帶即為進攻勒烏圍正路昨豐昇額已奏帶綠營兵四千土兵

二千前往攻勦自能得力但金川賊番較小金川更為狡黠而潛劫營寨截掠糧道尤其長技著傳諭三路官兵安營設卡之處預為加意嚴防設或賊衆潛來劫掠即奮勇殲戮自不敢輕視官軍而後路糧道軍臺並各派幹練大員往來巡護方為妥善至舒常所奏截殺賊衆官兵及糧臺兵丁內有帶傷及陣亡者並著查明報知豐昇額咨部賞卹

臣等謹按官兵攻克美諾由帛噶爾角克追勦

進克底木達維時澤旺既擒小金川全境悉定
旋即分軍三路聲討金川兵威壯盛自可迎刃

節解乃蒙

睿慮周詳即以賊番狡黠恐有刼截滋擾於分路前進
之初

諭令安設營卡後路糧臺宜嚴防妥護

天語丁寧幾先燭照迨後西路軍營設備偶疎遂致失
事益信思患預防之不可不早也

同日

上諭內閣曰現今川省軍務需員辦理文綬在川已逾半載諸事稍為熟習如訊無別情即將伊留於軍營自備資斧効力贖罪如催趲各路糧運及安置降番等事派令承辦倘再不實力奮勉該督等即據實嚴叅加倍治罪

平定兩金川方略卷四十六